

PEMBERITAHUAN PERTANYAAN DEWAN RAKYAT

PERTANYAAN : BUKAN JAWAB LISAN

**DARIPADA : DATO' DR. NIK MAZIAN BIN NIK MOHAMAD
[PASIR PUTEH]**

SOALAN :

Dato' Dr. Nik Mazian bin Nik Mohamad [Pasir Puteh] minta **MENTERI PERUSAHAAN PERLADANGAN DAN KOMODITI** menyatakan apakah yang telah dilakukan oleh Kerajaan terhadap penurunan harga getah yang mendadak. Apakah punca sebenar sebab kejatuhan harga getah ini. Berapa ramaikah pekebun-pekebun kecil yang terkesan dan berapakah bantuan yang dihulur setakat ini.

JAWAPAN:

Tuan Yang Di-Pertua,

Untuk makluman Ahli Yang Berhormat, harga getah seperti komoditi lain adalah tertakluk kepada faktor penawaran dan permintaan global. Kemerosotan harga getah yang dialami buat masa ini berpunca, antara lain kelembapan permintaan ekoran pertumbuhan ekonomi yang kurang memberangsangkan di negara-negara pengimport utama seperti China, Amerika Syarikat, Jepun dan Kesatuan Eropah.

Selain itu, pertumbuhan penawaran getah daripada negara-negara pengeluar ekoran pertumbuhan kawasan baru pada tahun 2005 hingga 2008 telah menyebabkan lebih bekalan getah di pasaran global.

Bagi memperkukuhkan harga getah, Kerajaan melaksanakan langkah-langkah berikut:

- i. meningkatkan aktiviti-aktiviti penyelidikan bagi mempelbagaikan kegunaan getah. Ini termasuk penghasilan produk-produk berasaskan getah yang baru dan penggunaan getah dalam pembinaan jalan raya. Langkah ini akan membolehkan peningkatan penggunaan getah asli dalam negara; dan
- ii. menyediakan insentif menanam semula pokok-pokok getah yang tua dengan benih klon getah yang berkualiti tinggi. Dalam hal ini, Kerajaan menyediakan geran tanam semula getah sebanyak RM9,230 se hektar di Semenanjung, dan di Sabah dan Sarawak

masing-masing pada kadar RM14,000 se hektar dan RM13,500 se hektar. Jumlah peruntukan bagi maksud ini untuk tahun 2014 adalah RM206.4 juta dan bagi tahun 2015 adalah sebanyak RM125.7 juta.

Selain itu, Kerajaan sedar kesan kejatuhan harga getah ke atas pendapatan dan kehidupan pekebun kecil. Sebagai Kerajaan yang bertanggungjawab dan prihatin, pemberian *one-off* sebanyak RM500 dengan peruntukan sebanyak RM127.3 juta telah disediakan pada tahun 2013 di bawah program Bantuan Khas Kejatuhan Harga Getah dan ianya disalurkan kepada seramai 254,672 pekebun kecil di seluruh negara. Bantuan khas ini juga telah disediakan dalam tahun 2014 dengan peruntukan sebanyak RM150 juta melibatkan seramai 260,000 pekebun kecil yang layak dan ianya mula diberikan sejak pertengahan bulan Jun 2014.

Bagi memperkukuhkan harga di peringkat ladang, Lembaga Getah Malaysia (LGM) akan melaksanakan mekanisma penetapan harga di ladang melalui penetapan diskaun antara harga FOB SMR 20 dan harga diterima oleh pekebun kecil. Mekanisma ini telah mula dilaksanakan mulai bulan November 2014. Di bawah mekanisme ini, koperasi pekebun kecil akan juga digalakkan membeli getah daripada pekebun kecil pada kadar diskaun yang ditetapkan dan menjualnya terus kepada pengilang. Dengan berbuat demikian, rantai pemasaran antara pekebun kecil dan pengilang akan dipendekkan, di samping mempertingkatkan pendapatan pekebun kecil.

Sebagai langkah jangka masa panjang, Kerajaan dalam Bajet 2015 telah mengumumkan peruntukan awal dana sebanyak RM100 juta bagi pelaksanaan Insentif Pengeluaran Getah (IPG) mulai tahun 2015. Di bawah IPG, insentif sebanyak RM0.30 sen sekilogram akan disediakan sekiranya harga SMR 20 berada di paras RM4.60 atau harga *cuplumps* di peringkat ladang berada di paras RM1.75 sekilogram dan ke bawah.

Di peringkat antarabangsa, Malaysia telah mencadangkan mesyuarat peringkat Menteri di kalangan negara-negara *Association of Natural Rubber Producing Countries* (ANRPC) pada suku tahun pertama 2015. Ini bertujuan membincangkan dasar mengimbangi penawaran dan permintaan di mana negara-negara ANRPC menyumbang hampir 93 % pengeluaran getah asli dunia.

Di samping itu, *International Tripartite Rubber Council* (ITRC) bermesyuarat mulai 17 November hingga 20 November 2014 di Kuala Lumpur. Ahli-ahli ITRC terdiri daripada Malaysia, Indonesia dan Thailand yang secara kolektif menghasilkan hampir 65% pengeluaran getah dunia. Matlamat mesyuarat ITRC tersebut adalah untuk menentukan langkah yang harus diambil oleh ketiga-tiga negara anggota untuk membendung penurunan harga getah. Tindakan susulan oleh ketiga-tiga anggota ITRC bergantung kepada keputusan-keputusan yang dicapai dalam mesyuarat tersebut.

Sekian, terima kasih.